

# Far pli visibel la part feminina

L'Archiv da la cultura da dunnas tschertga dunnas engaschadas e crudadas en emblidanza

ANDREAS CADONAU/FMR

■ **Far visibel las stentas da la cumpart feminina a favur da la societad per exempel cun denominar vias e piazzas cun nums da dunnas: L'Archiv da cultura da dunnas porscha sustegn cun preschentar dunnas grischunas degnas dad esser pli preschentadas.** Il dumber da nums cuntanschibels enfin ussa via la pagina buendnerinnen.ch nun è fitg vast. Nums da dunnas che han contribuì al prosperar da la societad e che fissan degnas dad embellir cun lur num ina via ni ina piazza communal. Per augmentar la visibilitad da la cumpart feminina a nossa societad: Ina finamira che la politica grischuna sustegna.

## Sustegn dal parlament grischun

Il Cussegl grond ha acceptà en accordanza cun la regenza grischuna l'emna passada a Tavau in'incumbensa dal deputà *Thomas Bigliel* (PLD, Tschintg Vitgs). Ina che pretenda da promover la preschientscha da la dunna en la publicitad cun denominar vias e piazzas. En la risposta a l'incumbensa ha la regenza grischuna menziunà la pagina da l'Archiv da cultura da las dunnas dal Grischun

che porschia nums da dunnas che hajan contribuì cun lur engaschi al svilup da la societad grischuna. La manadra da l'Archiv da cultura da las dunnas, *Silke Margherita Redolfi*, ha dà d'entellir d'elavurar ina glista da nums e biografias curtas da dunnas per las singulas vischnancas. Quai vegn fatg per sustegnair las vischnancas prontas d'embellir vias e piazzas cun nums da dunnas ch'èn s'engaschadas en diversas spartas per lur communitad. «Nus lavurain londervi.»

## Il fastizis istorics èn stgars

En la scripziun da l'istorgia grischuna nun èn las dunnas fitg preschentadas. Ma era ils fastizis da la lavur da las dunnas grischunas en ils decennis passads ston vegnir scuverts. «Quai pretenda blera lavur.» *Silke Margherita Redolfi* ha regurdà al modest preventiv da l'Archiv da cultura da las dunnas ed a las resursas persunalas limitadas. L'archiv è per part dependent da lavur voluntaria per exequir sia lavur. «Per quel motiv envidain nus la populaziun da far propostas.» Proponer dunnas degnas dad embellir cun lur num ina via ni piazza communal pon ins medemamain via buenderinnen.ch. «Dunnas engaschadas crudadas en emblidanza

datti avunda.» Era en las regiuns periferas dal chantun Grischun. La manadra da l'Archiv da la cultura da las dunnas ha ditg da gugent sustegnair vischnancas prontas da render attent ad ina atgna

## «Dunnas engaschadas crudadas en emblidanza datti avunda.»

*Silke Margherita Redolfi*, manadra da l'Archiv da cultura da las dunnas

burgaisa. *Silke Margherita Redolfi* ha dentant fatg stim che l'interess da la vart da las vischnancas nun è fitg grond. Ella ha regurdà al cussegl da la citad da Cuir che haja dacurt desistì da numnar ina punt nova cun il num dad ina onuravla

dunna da Cuir. «Quai malgrà pliras propostas.» A l'avis da la manadra da l'archiv dovri persunas sensibilisadas per la tematica en ina suprastanza communal. «Uschiglio restan tuttas bunas intenziuns vanas.»

## Sutrepreschentadas

Stentas dad augmentar la preschientscha feminina datti anc en auters secturs sco per exempel tar l'enciclopedia Wikipedia. Gidar a megliar la discrepanza tranter dunna ed um tar l'enciclopedia vul ina gruppa da schurnalistas da SRF, Ringier e Wikimedia CH. La gruppa definischa dunnas activas, ni stadas activas en la societad e las preschenta en la pagina da Wikipedia. Gia s'engaschada en quella gruppa è la schurnalista da RTR, *Sabrina Bundi*, sco ch'ella ha ditg. Ella ha era gia scrit contribuziuns davart dunnas per Wikipedia. Tar l'enciclopedia datti anc bler da far per promover la dunna. Sco che l'enciclopedia inditgescha senza derivan main che 15 percent da tuttas contribuziuns da Wikipedia da dunnas. Consequentamain sajan artitgels davart dunnas e temas relevants per dunnas sutrepreschentads tar Wikipedia, scriva la platfurma en atgna chaussa.